

RM1.4j bantu mangsa banjir di Parlimen Kapar

KLANG: Majlis Keselamatan Negara (MKN) memperuntukkan dana RM1.4 juta bagi membantu mangsa banjir di kawasan Parlimen Kapar membabitkan kawasan Sungai Pinang, Selat Klang dan Sementa, di sini.

Pengerusi Barisan Nasional (BN) Kapar, Datuk Abdul Rahman Palil berkata, bantuan diagihkan kepada 2,800 mangsa banjir yang berlaku di kawasan itu pada Mac lalu dengan nilai sumbangan sebanyak RM500 bagi setiap mangsa.

"Kami mengucapkan ribuan terima kasih kepada Perdana Menteri, Datuk Seri Najib Razak atas kesudian beliau meluluskan dana untuk diberikan kepada mangsa banjir penduduk di kawasan ini.

"Bantuan diberikan secara adil kerana ia hak rakyat dan kami ikhlas

membantu mangsa banjir di kawasan Parlimen ini," katanya di sini.

Abdul Rahman yang juga Ahli Dewan Undangan Negeri (Adun) Sementa berkata, bantuan seterusnya diberikan kepada 500 mangsa di Sementa dan Sungai Pinang minggu depan.

Penerima bantuan, Zalina Abdullah, 29, berkata, dia akan menggunakan wang bantuan itu untuk membeli kelengkapan persekolahan anaknya.

Dia yang sudah menetap di Kampung Delek Kiri, di sini, lebih 10 tahun lalu berkata, bantuan itu bukti BN mengotakan setiap janji mereka.

"Walaupun bantuan diberikan lapan bulan selepas kejadian banjir, namun kami tetap gembira dengan bantuan ini kerana BN sentiasa menepati janji," katanya.